

Headlines

- 1 प्रधानमंत्री नरेंद्र मोदी होर 6में बिम्सटेक शिखर सम्मेलन च हिस्सा लैने लेई 2 दिनें दी जात्तरा पर अज्ज थाईलैंड दी राजधानी बैंकाक पुज्जी गेदे न।
- 2 राज्यसभा च वक्फ संशोधन बिल 2025 गी विचार ते पास करने लेई अज्ज पेश कीता गेआ। सरकार नै विरोधी पार्टियें गी इस बिल दा समर्थन करने दी गुजारिश कीती ऐ।
- 3 उपराज्यपाल मनोज सिन्हा होरें अमरनाथ जात्तरा लेई आपदा प्रबंधन ते यात्री निवास परिसरें दे विकास च हासल प्रगति दी समीक्षा कीती।
- 4 जंगलात ते पर्यावरण मंत्री जावेद राणा होरें “एक पेड़ मां के नाम” अभियान तैहत महत्वकांक्षी लक्ष्य कामयाबी कन्नै हासल करने लेई सब्भनें मुतलका धड़ें दी सराहना कीती।
- 5 मौसम विभाग नै जम्मू-कश्मीर च अगले हफ्ते बरखा ते बर्फबारी दी पेशगोई कीती ऐ।

<><><><><><>

PM-Thailand Visit

प्रधानमंत्री नरेन्द्र मोदी होर 6में बिम्सटेक शिखर सम्मेलन च हिस्सा लैने लेई द'ऊं दिनें दी जात्तरा पर अज्ज थाईलैंड दी राजधानी बैंकाक पुज्जी गेदे न। थाईलैंड दे उपप्रधानमंत्री ते ट्रांसपोर्ट मंत्री सूर्या जुंगरुंगरेंगकिट होरें उं'दा सोआगत कीता ते उ' नेंगी गॉर्ड ऑफ ऑनर दित्ता गेआ। होटल पुज्जने पर भारती समुदास दे लोके उं'दा भव्य सोआगत कीता ते गरबा नृत्य पेश किया। बरे 2016 ते 2019 दे बाद प्रधानमंत्री मोदी हुंदी थाईलैंड दी एहू व्रीस जात्तरा ऐ। थाईलैंड पुज्जने पर श्री मोदी होरें सोशल मीडिया दी इक पोस्ट च आखेआ जे ओहू गल्लबात आहले अधिकारिक कार्यक्रमें च हिस्सा लैने ते भारत ते थाईलैंड बश्कार सैह्योग मजबूत करने दे इच्छुक न। प्रधानमंत्री मोदी होरें थाई रामायण-रामाकेन दी प्रस्तुति दिक्खी। प्रधानमंत्री मोदी अज्ज सं' झां थाईलैंड दे प्रधानमंत्री पिटांगतर्न शिनावत् हुंदे'नै दपक्खी गल्लबात करडन। ओहू दपक्खी सरबंधें दे सब्भनें आयामें च हासल प्रगति दी बी समीक्षा करडन।

<><><><><><>

RS-Waqf

राज्यसभा च वक्फ संशोधन बिल, 2025 गी विचार ते पास करने लेई अज्ज पेश कीता गेआ। लोकसभा नै कल रातीं वक्फ संशोधन बिल, 2025 गी पास करी दित्ता हा। इस बिल दा मकसद विरासती थाहें दी सुरक्षा ते समाजी कल्याण गी बढ़ावा देने दे प्रावधानें दे कन्नै वक्फ दिएं संपत्तियें दे प्रबंधन गी बवस्थित करनाऐ। एहदा मकसद संपत्ति प्रबंधन च पारदर्शिता बधाइयै, वक्फ बोर्डें ते मुकामी अधिकारियें बश्कार तालमेल गी बवस्थित करना ते बक्ख-बक्ख सरबंधत पक्खें दे अधिकारें दी राक्खी करियै शासन च सुधार करना बी ऐ। एहू बिल मुस्लिम महिलाएं, खासकरियै विधवाएं ते तलाकशुदा महिलाएं दी आर्थिक ते समाजी स्थिति च सुधार करग। इस बिल गी पेश करदे होई अल्पसंख्यक मामलें दे केन्द्री मंत्री किरन रिजिजू होरें गलाया जे बिल गी बक्ख-बक्ख सरबंधत पक्खें दे कन्नो-कन्नी संसद दी सांझी समिति दे कन्नै तफ्सीली सलाह-सुत्तर दे मगरा आहन्नेआ गेआ ऐ। उ'नें बरोधी पार्टिएं गी इस बिल दा समर्थन करने दी गुजारिश कीती।

<><><><><><>

LG-SASB

लेफ्टिनेंट गवर्नर मनोज सिन्हा होरें श्री अमरनाथ जी श्राईन बोर्ड ते कार्यकारी एजेंसिएं दे अधिकारिएं कन्नै इक बैठक लाइयै आपदा प्रबंधन ते यात्री निवास परिसरें दे विकास च हासल प्रगति दी समीक्षा कीती। एलजी होरें बालटाल, नुनवन, सिद्धडा ते बिजबिहाडा च जारी कम्में दी स्थिति दा आकलन कीता। उ'नें सरबंध्यत अधिकारिएं ते कम्म तोढ चाढा करदी एजेंसिएं गी निर्देश दिते जे ओहू श्रद्धालुएं दी सुविधा लेई बक्ख-बक्ख थाहें पर जारी विकास कम्में च तेजी आहनन। एह्दे अलावा एलजी होरें जात्तरा शुरु होने शा पैहले बालटाल ते नुनवन आधार शिविरें च महत्वपूर्ण ढांचागत विकास परियोजनाएं गी तेजिआ कन्नै सबूरा करने दा बी हुकम रसाल कीता। एलजी हुंदी प्रधानता हेठ लाई गेदी इस बैठका च श्री अमरनाथ जी श्राईन बोर्ड दे मुख्ब कार्यकारी अधिकारी ते होरनें सरबंध्यत अधिकारिएं बी हिस्सा लैता।

<><><><><><>

Udhampur (byte)

सुरक्षा बलें उधमपुर जिले च मजालता दे चोर पंजुआन ग्रांस च 2 संदिग्धें दे दिक्खे जाने मगरा तलाशी अभियान शुरू कीता गेआ। उआं कठुआ वारदात मगरा पिछले 8एं दिनें थमां इलाके दी घेराबंदी कीती गेदी ऐ। उधमपुर रियासी रेंज दे डी.आई.जी मोहम्मद रईज़ भट्ट होरें इस गल्ला दी पुष्टि कीती ऐ जे अज्ज इलाके च बादू सुरक्षाबलें दी तैनाती कीती गेई ऐ। स्हाड़े संवाददाता कन्नै गल्ल करदे होई उनें दस्सेआ।

<><><><><><>

Udh. TB Free

टीबी मुक्त भारत पैहलकदमी दे तैहत उधमपुर जिले दिएं 67 पंचैतें गी टीबी शा मुक्त घोशत करी दित्ता गेआ ऐ जेहड़ी पूरे प्रदेश लेई इक बड्डी उपलब्धि ऐ। उधमपुर दिएं डिप्टी कमिशनर सलोनी राय होरें दस्सेआ जे ब'रे 2024 च जिले दिएं 23 पंचैतें गी टीबी मुक्त पंचैत दा दर्जा हासल होआ हा ते इस ब'रे 44 होर पंचैतां टीबी शा मुक्त होई गेइयां न ते हून इ'नें सब्भनें पंचैतें दी कुल गिनतरी 67 होई गेई ऐ। उ'नें आखेआ

<><><><><><>

Udh.Artificial Limbs

उधमपुर दा समाज कल्याण विभाग भारतीय कृत्रिम अंग बनाने आहली कापेरिशन- ALIMCO दी सांझ भ्याली कन्नै औंदी 5 अप्रैल शा 10 अप्रैल तगर जिले दी बक्ख-बक्ख थाहें जियां रामनगर, मजालटा, लाटी, नारसू, उधमपुर ते होर दुए इलाकें च लोडमंदें ते दिव्यांग लोकें लेई एक विशेष कैंप दा आयोजन करा'रदा ऐ। इस प्रोग्राम बारे तफसीली जानकारी सांझे करदे होई उधमपुर समाज कल्याण विभाग दियां जिला अधिकारी कनिका गुप्ता होरें आखेआ।

<><><><><><>

Rana Ek Ped

जम्मू-कश्मीर नै 'एक पेड़ मां के नाम' अभियान दे तैहत 1 करोड़ 50 लक्ख रूक्ख-बूहटे लाने दा महत्वकांक्षी लक्ष्य पूरी कामयाबी कन्नै हासल करी लैता ऐ। इस उपलब्धि दी सराहना करदे होई जंगलात ते पर्यावरण मंत्री जावेद अहमद राणा होरें आखेआ जे एह्दा श्रेय, सरकारी एजेंसिएं, ग्रामीण स्तर दे इदारें, मुकामी लोकें ते बक्ख-बक्ख सरबंध्यत पक्खें दे सांझे जतनें गी जंदा ऐ। मंत्री होरें इस अभियान दी अगुवाई करने च जंगलात मैहकमे दे जतनें दी सराहना कीती ते आखेआ जे रूक्ख-बूहटे लाने सरबंध्यी इस अभियान नै लोकें गी पर्यावरण दे प्रति मता जागरूक बनाया ऐ। ध्यानजोग ऐ जे प्रधानमंत्री नरेन्द्र मोदी होरें 5 जून 2024 गी विश्व पर्यावरण दिवस दे मौके उप्पर 'एक पेड़ मां के नाम' अभियान दी शुरुआत कीती ही ते एह्दा मकसद अपनी माता ते कन्नै धरती माता दे प्रति बी हिरख ते सम्मान दर्शाना ऐ।

<><><><><><>

NC-Meeting

जम्मू-कश्मीर नेशनल कांफ्रेंस दे विधायक दल ते भ्याल पार्टियों दी कल मुखमंत्री उमर अब्दुल्ला हुंदी प्रधानता च बडुलै 11 बजे श्रीनगर च उपमुखमंत्री हुंदी सरकारी कोठी च मीटिंग लग्गोग। एन.सी दे वरिष्ठ लीडर ते पार्टी दे चीफ व्हिप मुबारक गुल हुंदे आसेआ जारी आधिकारिक विज्ञप्ति मूजब पार्टी दे सब्भनें विधायकें गी मीटिंग च शामिल होने दा अनुरोध कीता गेदा ऐ, उआं मीटिंग दे एजेंडे बारै जानकारी नेई सांझी कीती गेदी।

<><><><><><>

JKAACL

जम्मू-कश्मीर दी कला, संस्कृति ते भाशाएं सरबंधी अकैडमी आसेआ अज्ज के.एल. सहगल हॉल, राईटर्स क्लब जम्मू च गल्लबात आहले इक कार्यक्रम ते इक कताब विमोचन समारोह दा आयोजन कीता गेआ। पद्मश्री नरसिंह देव जम्वाल हुंदे कन्नै 'इक मलाटी' नांS दे गल्लबात आहले कार्यक्रम दे आयोजन दे कन्नो-कन्नी उं'दी लिक्खी कीता 'मन्नो नेई मन्नो' दा विमोचन बी कीता गेआ। इस मौके उपपर जम्मू युनिवर्सिटी दे डोगरी विभाग च असिस्टेंट प्रोफेसर डाक्टर पदम देव सिंह होरें श्री एन.डी. जम्वाल हुंदे सांस्कृतिक जोगदान पर शोध पत्र पेश कीता जिसलै के राकेश वर्मा होरें उं'दी कताब बारै पर्चा पढ़ेआ। इस मौके पर पद्मश्री एन.डी. जम्वाल होरें आखेआ

<><><><><><>

Doda-Volleyball (byte)

भारतीय सेना नै डोडा दे सिटी मिडिल स्कूल च इक दोस्ताना वॉलीबॉल मुकाबले दा आयेजन कीता। एहदा मकसद नौजवानें गी खेड्ड गतिविधियें च शामिल करना ते उनेंगी नशे दी बुरे प्रभावें बारै जानकार बनाना हा। टूर्नामेंट दी शुरूआत 10 राश्ट्रीय राइफल्स टीम ते डोडा दे सरकारी डिग्री कॉलेज बश्कार मुकाबले कन्नै होई। कॉलेज दे फिजिकल एजुकेशन डायरेक्टर डॉ. जयशंत सिंह होरें इस पहलकदमी दी सराहना करदे होई आखेआ। इस प्रतियोगिता च अजे होर बी मैच खेड्डे जाडन। स्टाडे संवाददाता कन्नै गल्ल करदे होई वॉलीबॉल दे इक खडारी अर्जुनजीत होरें दस्सेआ।

<><><><><><>

Weather

मौसम विभाग नै केन्द्र शासित प्रदेश जम्मू-कश्मीर च अगले हफ्ते बरखा बरने दी पेशगोई कीती ऐ। आकाशवाणी दे जम्मू संवाददाता दी रिपोर्ट मूजब, उत्तरी कश्मीर ते सोनामर्ग-ज़ोजिला इलाके दिएं उच्चिएं धारें पर अज्ज बर्फबारी ते हौली बरखा दी संभावना ऐ। एहदे परैन्त कल 4 अप्रैल थमां 8 अप्रैल तोहड़ी मौसम खुशक रौहग। ऊ'आं विभाग दा आखना ऐ जे 8 अप्रैल गी दपैह्नी मगरा गासै च बहल घनोने ते उत्तरी कश्मीर ते सोनामर्ग दिएं उच्चिएं धारें पर हल्की बर्फबारी दी मेद ऐ। एहदे परैन्त औंदी 9 ते 10 अप्रैल गी कश्मीर संभाग दिएं मती सारी थाहें सने जम्मू खित्ते दिएं टामीं-टामीं थाहें पर हौली बरखा ते उच्चिएं धारें पर बर्फबारी होई सकदी ऐ। एहदे मगरा 11 अप्रैल गी बी मौसम बदलोखडा रौहग ते मैदानी इलाकें च हौली बरखा बरने ते उच्चे पहाड़ी इलाकें च हल्की बर्फबारी दा इमकान ऐ।

<><><><><><>